

## Clostra Son Jon



### Il fundatur da la clostra, Carl il Grond



Fanestra da la stanza da „Hohenbalken“ dadouravia

### Minch'on als 28 schner festageschan las Benedictinas da Müstair lur fundatur Carl il Grond.

Sour Priura Pia Willi raquinta, co cha la sour Carolina as preparaiva plü bod sün quista festa. Ella giaiva sün palantschin per las rösas da palperi ed ornaiva cun quellas il purtret da Carl il Grond vi da la fatschada illa cuort dal süd. Lura exerzitaiva ella sün sia flöta üna serenada per seis patrun dal nom.

Avant la mort da sour Carolina ha la sour Pia impromiss ad ella, da celebrar quista festa eir in avegnir

cun la medemma tradiziun. Davo tschaina as radunan las Benedictinas illa cuort dal süd pro'l purtret da lur fundatur. Dürant il davomezdi han las sours fingià palà davent la naiv e preparà il lö. Saira vegnan igluminadas via e piazza cun numerusas chandailas. Cumünaivelmaing fan ellas ün'urazchun, chantan la chanzun tradiziunala dal di festiv e dischan ils arövs. „Eir scha Carl il Grond es ün dispittaivel Sonch, ingrazchain nus listess ad el la fundaziun da nossa clostra e til onurain sco nos donatur“, raquinta la priura.

La legenda da Müstair disch, cha Carl il Grond saja intivà in ün boffaduoir da naiv sül Pass da l'Umbrail. Quai d'eira pro seis retuorn sur il pass, l'on 774, davo sia incurunaziun sco rai dals Langobards. Per seis salvamaint haja el impromiss la fundaziun d'üna clostra. Uschè esa capità, ch'el ha laschà edificar la clostra Son Jon. La legenda vegn sustgnüda da la scienza: Ils böschs per l'edificaziun da la baselgia sun propi gnüts terrats l'on 775. Müstair d'eira quella jada ün important punct central strategic per la politica d'expansiun dal imperatur Carl il Grond. Ultra da quai gnivan quia bleras vias

commerzialas insembel. Carl il Grond nu d'eira be ün guerrier, dimpersè eir ün grond promotur da la cultura cristiana e dal uorden benedictin. El ha laschà importar il text autentic da la regla benedictina da l'Italia i'l reginam dals Francs. L'on 1165 ha l'imperatur Friedrich Barbarossa laschà canonisar a Carl il Grond dal cuntrapapa Pascalis il III. Illa clostra da Müstair s'inscuntra adüna darcheu a l'imperatur. In baselgia sta la plü veglia statua monumentalada da Carl il Grond. l' museum clostral as vezza üna sculptura barocca da l'imperatur. l' urbar dal 14 avel tschientiner vegn Carl il Grond illustrà sco fundatur cun ün model da la baselgia. Medemmamaing porta el sül purtret vi dal mür illa cuort dal süd ün model da la baselgia: ma quia as tratta dal dom dad Aachen.

Las muongias da Müstair as saintan zuond colliadas cun lur fundatur. Minch'on sül di da sia mort, ils 28 da schner, celebreschan ellas üna pitschna, intima festa in si'onur.

Elke Larcher  
tradüt in rum.  
sour Domenica Dethomas



### Lifu a Fuldera

La suprastanza ha stuvü decider da desister per quista stagiun da la montascha dal runalin per noss pitschens, chi's rechatta a Fuldera. Quel fat depluresch'ella, però seguaints motivs han manà a la decisiun:

- Il runalin dombra uossa bundant 40 ons e stuves gnir reparà, quai chi nu sta plü in ingüna relaziun
- Eir davo üna reparatura nun accumuliss quel hozindi plü las pretaisas tecnicas ed impustüt n'eir na quellas da sgürezza

La suprastanza es in tschercha d'üna soluziun per la stagiun 2010/11 ed ella es persvasa da chattar üna nouva sporta chi cuntainta a tuots.

Ella giavüscha da tour cugnuschentscha ed ingrazcha per l'incletta.